

## CALVARY BIBLE COLLEGE-AH NGEI AW NIANG!

-Pastor K. Lal̄hazuala

Pathian thu hi eng nge ni? tih zawhna hi chhang dawn ta ila, chhanna thuhmun vek kan pe ang em le! Chutih rualin chhanna tam ber tur chiangsa bang chu “*Bible hi Pathian Thu a ni*” tih hi a ni ngei ang. Bible kan chhiar hian khawilai chang pawh chhiar ila, Pathian thu chhiarah kan inngai thin nge, ngai lo zawk? Lo inngai ta lo ila, Bible hi Pathian thu ah kan pawm lo tihna a ni ta em ni ang le? Chuti a nih si chuan Pathian thu-ah lo ngai ta vek ila, “*Bible hi Pathian thu*” a ni tiin kan pawm tihna a ni mai dawn lawm mi? Mahse le, ***Bible kan han chhiara rul thusawite, Satana thusawite kan chhiar hian Pathian thu chhiarah kan in ngai ngam tho ang em le?*** Hetiang tak a nih avang hian mihring ngaihtuahnaah hian thil pathum a lo langchhuak nawlh thin reng a, chungte chu: (1) *Bible hi Pathian thu a ni* (2) *Bible ah hian Pathian thu a awm* (3) *Bible ah hian Pathian thu lo a awm em?* tihte hi kan ngaihtuah ve ngai emaw!

Awle, kan Bible hi eng ang lehkhabu nge a nih chiah reng le? Chutiingin kan Bible hi eng ang lehkhabu nge a nih loh le? Gnana Robinson-a chuan Bible hi eng ang lehkhabu nge a nih loh tih chungchang hetiang hian a lo ziak a: (1) *Bible Hi Pathian ziak sa, van atanga rawn thlak a ni lo*; (2) *Bible hi dawi bu (magic book) a ni lo*; (3) *Bible hi nungchang kaihhruaina bu mai a ni lo*; (4) *Bible hi chanchin (history) ziakna pangngai a ni lo*; (5) *Bible hi science lam thil ziahna bu a ni lo*; (6) *Bible hi lehkhabu awl (easy) a ni lo*.

Muslim thenkhat chuan an sakhaw lehkhabu ‘Koran’ hi van atanga Pathian ziah sa rawn tla angah an ngai a; chutiang ang chuan keini Kristiante hian kan sakhaw bu ‘Bible’ hi van atanga Pathian ziah sa diam rawn tla ta-ah erawh kan ngai ve si lo a. A ziahtute pawh keimahni anga mihring pangngai ve tho an ni hlawm a, mahse anmahni zeldin thu mai mai emaw, an awmhawp thu mai mai emaw an ziak an ni hauh si lo. Ziak tura thuneihna petu leh ziah tur thu an hnena rawn sawitu a awm bawk si a ni. Chu ziah theihna leh ziah tirtu chu hunbi chung leng Pathian a ni si a. A ziahtuten an thil hmuh loh pawh chunglam hriattirna leh kaihhruaina zela ziak an nih avangin lei leh van siam tirtu leh mihring siam tirtu khan a ziahtute chu Pathian kiangah awm lo mahse rinna mita hmuhtira awmin thilsiam tantirtu chungchang te pawh chu chunglam hriattirna ang zelin hunbi hnuai leng hnuailam mihringte chuan an lo ziak chhuak ta si a ni. Chuvangin Bible thu te hi direct taka Pathian kutzungtang chhuak ni si loin, famkimlo mihring kutzungtang chhuak a ni lawi si a. Chutihrualin mihring thu mai mai an ni lawi bawk si lo, ziah theihna petu leh ziahtirtu chu Pathian a nih tlat bawk si avangin Pathian thu kan ti lo thei lo bawk si a ni. Hetiang tak a nih avang hian *conservative scholar* pakhat John Stott-a chuan “*Bible hi Pathian thu a nih ang bawkin mihring thu pawh a ni e*” a lo tih hial reng a. Amaherawhchu, chung thu zawng zawngte chu Pathian thutak tihlan chhuah nan ziak tel an ni a. Chuvangin, a pum puia thlirin “Pathian thu” a ni vek a. A pum puia thlira “Pathian thu” chhungah hian Pathian thu laimu, thudik, kan nunpui tur, a thuchah (message), Pathian hnen lam min hruaitu chu a awm a. ***Chuvangin a chung thute a nihna tak man fuha hrethiam tur chuan Thlarau thianglim kaihhruaina leh Kohhran huang chungah ngei chik taka a chin chhuaka kan zir hi thil tul tak a ni.*** Ethiopia mi tilreh pakhatin Isaia bu a lo chhiar ve vung vung a; Philippa’n a va pan a, “*I chhiar kha a awmzia i hria em?*” an tih phut mai a; a chhiar awmzia chu a lo hre der lo chu niin! “*Tuma mi hrihfhiah lohvin engtin nge ka hriat theih ang?*” a ti khup zal zal mai zawng a nih kha mo! (Tirh. 8:30-31).

Kan sawi tak atang ngawt pawh khan kan Bible hi lehkhabu naran leh awlai tak zawng a ni hauh lo. ***A chungu thu inziakte hi mahni ngaihdan leh duhdan ang ngawta hrilhfiah ngawt mai chi pawh a ni kher lo mai thei a ni. A ziaktute hunlai leh kan hun inkar a inhlat tawh deng deng hle mai a.*** Kan hriat atana tha chu Bible hi lehkhabu upa tak, kum tam tak liam tawha ziaik a ni a, an ziaik kim hun atangin kum 2000 dawn a lo ni ta reng mai. Thuthlung Hlui bute hi Pathian thu atana pawm a nih theih nan kum 1000 aia rei mah hun a aw h a. Dan bute hi B.C. 400 velah Pathian Thu atan pawm fel a ni chauh a. Zawlnei lehkhabuthe hi B.C. 200 velah Pathian Thu atan pawm a ni leh chauh a. A dang zawng (thuziakte) hi A.D. 90 velah Pathian Thu atan pawm fel an ni leh chauh baw k a. Tin, Thuthlung Thar pheih hi chu A.D. 367 velah Pathian Thu atan pawm fel chauh a ni.

***Bible ram leh kan ram leilung pianphung pawh a inang lo hle baw k a.*** Lal Isua rawngbawla a vahvel dante hi kan awmna ram atang chuan chhut thiam har khawp a ni. Baptisma chang turin Galili atangin Jordan luih a lokal a, Diabola thlem turin thlalerah Thlarau hruai luhin a awm ta a (Mat. 4:1); Galili ramah a kal ta daih a, Nazareth khua a kalsan a, Kapernaum khuaah a awm ta reng a (chu chu Zebulon leh Naphtalim biala dil kama awm a ni, Mat. 4:12-13). Tlangah a lawn chhova, Kapernaum khuaa a luhin (Mat. 8:5); ral lehlam Gedarin mite ram chu a thlenin (Mat. 8:28). Miin hetiang ang hian Lal Isua vahvel dan hi sawi ta sela, kan hrethiam nghal uar uar a ngem le? Bible zir kan nih ngawt loh chuan kan hrethiam lo mai thei a ni.

***Tin, Bible ram mite nundan leh khawsak dan (cultural life) te leh kan nun dan leh khawsak phung pawh a inang lo hle baw k a.*** Culture hranna hian Bible zir chian a titul tak zet baw k a. Culture hian thuitak chu kan khawsak dan te, thil tha leh tha lo kan thliar dan te, kan hlaphuah dan thlengin a hril thin. Bible huna chengte chu hmanlai culture-a cheng an ni a, keini erawh chu ‘postmodern culture’ ah kan cheng tung tawh avangin kan culture a inthlau hle a. Paula te hun laia chibai an inbuk dan chu ‘fawh thianghlim’ a ni a. “*Fawh thianghlimin chibai inbuk rawh u,*” (Rom 16:16) a tih angte hi PYD fellowship-a lo tih ve ngawt chi a ni lo mai thei asin. Culture inan lohna avang hian “*Bible-in a ti*” tih vang ngawta a ziaik ang anga kalpui mai chi loh thil a awm thin a ni.

***Bible ram mite tawng hman leh kan tawng hman pawh a inang lo hle baw k a.*** A tirah chuan Thuthlung Hlui hi Hebrai leh Aramaik tawng aziak a ni a. *Gen. 31:47; Jer. 10:11; Ezra 4:8-6:18; 7:12-26; Dan 2:4-7:28* te hi Aramaik tawng ziaik an ni hlawm a. Thuthlung Thar bute erawh hi chu a bu pum hian Grik tawnga ziaik vek a ni. Chu chu Latin te, Syriac te, Ethiopic te, Coptic te, English te in an letling a, kum 1959 khan Mizo tawngin lehlin chhuah a lo ni ve ta chauh a ni. Hetiang tak a nih avang hian Bible thuchah dik tak man fuh tur chuan kan sawi tak te kha chhui tel a ngai thin a. Chuvang tak chuan Bible hi a chin chhuak tak meuh meuhva zir hi thil tul tak a ni.

Awle, heng kan sawi tak atang ringawt pawh hian Pathian kohna dawng a, hun puma rawngbawl tum tan chuan Bible College-ah ngei, thildang tih thulh thaka luhchilh law law hi kan tih makmawh a ni ta. PYD te zingah lehkhathiam leh zirmi tak tak te pawh kan awm ta, keini thalai lehkhathiam zawk lo chhuak mek te hian kan rual u te leh lehkhathiam vak pawh ni lem lo a kan ngaihte tan chauh Pathian rawngbawl hna hi ruat lo ila, ***kan Pathiam pawh hian lehkhathiam lo ai chuan lehkhathiam na na na chu hman tangkaina pawh a hre zawk fe ang*** tih hi I ring ngam ang u. Kan Bible pawh hi ngaihtuah teh ang u khai, lehkhathiam lo ai chuan lehkhathiam kutchhuak a tam hle a nia. Thuthlung Hluiah Mosia, lehkhathiam tak chuan lehkhabu panga lai a thawh a, tin, mi fing Solomona thawh chhun te hi ava hlu em! Thuthlung Thar lamah lah mi thiam tak Paula chuan lehkhabu sawmpathum lai a thawh baw k asin. Lehkhathiam lem loa kan ngaihte pawh hi Pathian hnen atan tihhranna

dawng leh training chhuak vek tho a ni tih te hi kan ngaihtuah ngai em? ***Tin, Apostol kan tih bik te pawh kha zirtirtu Isua ke bulah kum thum chhung tal tap Pathian Thu an lo zir reng asin!*** Chuvang chuan Bible College -a zirthiam na na na chuan Bible College -a zirthiam ve lo ai chuan Kohhran rawngbawlina huangah leh Kohhran kal zel dan turah pawh a thawh hlawk zawk ngei ang le.

Keini 'UPC of North East India' te pawn hmelmapiain min tihchhiat vek tumin min bei thin mahsela Pathian kaihhruaina azarah hma kan sawn zel a, kan Pathian Thu zirna run neih chhun leh rawngbawltu kan chherna pum pawhin hmeltar hmu zelin tunah chuan 'Bachelor of Theology (B.Th.)' level-ah upgrate a lo ni ve ta zel a, thlarau baptisma chang ngei qualified teacher kan nei ta zel bawk a, kan vannei hle mai. ***India ramah hian Theological/Bible College tam fe a awm a, mahse ka hriat chinah 'Oneness Pentecostal Bible College' erawh chu pakhat chiah a awm a, chu chu keini 'UPC of North East India' ten kan Bible College neih chhun liau liau, 'Calvary Bible College' Shillong hmuna awm hi a ni.*** Oneness Pentecostal-te tan chuan he college aia hlu leh zirna tha hi a awm hran chuang ang e maw! ***A chhan pawh India rama Theological/Bible College dang zawng zawng in a chin chhuaka an zir ve hauh lo Oneness Theology zir tel a ni si a.*** Chutiangin Bible College danga an zir tam tak zir tel reng chung siin Oneness tarmit (perspective) atanga Pathian Thu thlir leh zir a nihna te pawh hi a hlutna leh a thatna te pawh a ni awm e. Tin, kan Bible College awmna hmun hi a fuh hle mai, Meghalaya khawpui, Shillong hmuna awm a ni a, Shillong hi India ramah chuan sap tawng zirna hmun tha tak a lo ni bawk nen, Bible College zirlai te tan pawh sap tawng zirna hmun tha tak a ni zel bawk te hi a vanneih thlak hle a ni. Chuvang chuan PYD te zirna lamah tan la sauh sauh ila, pawl sawmpahnih kan pass velah Pathian Thu a chin chhuaka zir turin India rama 'Oneness Pentecostal Theology' zirna run awm chhun 'Calvary Bible College,' Shillong lam panin kan ipite pui nen i thawk thla zel ang u khai. ***Kan Pathian leh Kohhranhote hian Pathian rawngbawl tura inpe rau rau zingah thildang zawng zawng kalsan thaka zirna run Bible College-a kum thum chhung intuai hriama zir chhuak te hi an ensan ngai lovang tih hi i ring ngam ang u khai.***

Kan Pathian neih chhun Lalpa ISUA Krista'n malsawm rawh se. Amen.